



# البطة البيضاء الطيوبة


قصة عن الاحتضان بالعامية المصرية



كتابة و رسوم :- مريم الشرقاوي



كان يا ما كان في قديم الزمان و ما يحلى الكلام إلا بذكر النبي محمد عليه  
الصلاة و السلام . كان فيه بطة كبيرة بيضاء و طيوبة ومعها أولادها البط  
الصغير الجميل. البطة الكبيرة كانت بتحب تعلم البط الصغير كل حاجة  
بتعلمهم يعوموا في المية و ياكلوا الحبوب و يطيروا في الهوا



كل البط الصغير كان لونه أبيض زي مامتهم. ما عادا بطة واحدة بس كان  
لونها أصفر و ريشها بيلمع و جميل

في يوم من الأيام البطة الصفراء الجميلة اللي ريشها بيلمع في الشمس  
سألت مامتها البطة البيضاء الطيوبة و قالتها: مامتي يا حبيبتي أنا ليه  
لونى مش أبيض زي لونك ؟

مامتها قالتها يا بنتي يا حبيبتي انتي كبرتي و انا هحكليك حكايتك الجميلة  
كلها. قالتها البطة الصفراء الصغيرة طبعاً يا مامتي انا كبرت وعايزه  
اعرف حكايتي



قالت البطة البيضاء الطيوبة. زمان يا بنتي كان عندي ٣ بيضات حلوين و  
مقططين. حضنتهم كثير جدا و كل يوم اشوفهم هل طلع منهم بط صغنتوت  
ولا لا. وقعدت كثير كثير مستنياهم. وفي الآخر تعبت و قلت انا هطلع امشي  
شويه في الغابة.




وانا ماشية في الغابة لقيت بيضة مقطقة شبه البيضات بتاعتي،  
كان لونها مختلف شوية بس عجبتي، قعدت أدور على صاحبة  
البيضة ما لقتش أي حد، ناديت في الغابة " في حد هنا ". محدش  
رد عليا، قلت مينفعش اسيب البيضة دي لوحدها لازم اخدها معايا  
اراعياها، و فعلا خدتها و رجعت عشتي، و حضنتها مع البيضات  
بتاعتي.




بعد أسبوع لقيت البيض كله بيتكسر و يطلع منه بطايط صغيرة،  
كنت فرحانة جدا و مبسوطة و قعدت أتنطط من الفرحة، كان كلكم  
شكلكم جميل وحلو و صغنتتين.

ثلاثة لونهم أبيض وانتي يا حبيبتي كان لونك مميز و جميل  
لونك كان أصفر و ريشك بيلمع في الشمس.





اخذتكم كلکم عشان أعلمکم ازاى تعوموا فى المية و ازاى تاكلوا  
الحبوب و ازاى تطيروا فى الهوا  
و دلوقتى انتم كبرتوا و بقيتوا تعرفوا تعوموا فى المية و تاكلوا  
الحبوب و تطيروا فى الهوا



البطوطة الصغيرة الصفرا الجميلة حضنت مامتها و قالتها  
مش مهم اني أكون شبيهك،  
المهم اني اتعلم منك.  
مش مهم اني أكون من بطنك، المهم اني أكون جوه قلبك.



قصة البطة البيضاء الطيوبة

قصة عن الاحتضان

بالعامية المصرية

كتابة و رسوم :- مريم الشرقاوي

تصميم واخراج : حكاياتنا

hekayatona.net@gmail.com

تحت رعاية مبادرة الاحتضان في مصر

Kafala in Egypt

